

蘧齋詩話卷之二

天虛我生著

許泰字仲瑚別署度蝶鎮洋人家本小康其先人厚山上舍以慷慨樂施好客不倦傾其產迨易簣日家徒四壁仲瑚既長不暇習帖括乃學賈爲療貧計秉性狷介不苟取與慎交遊重然諾喜吟咏壓綫之暇借詩詞以自遣偶有所得樂而忘倦所著陶寫性靈不事雕琢間作噍殺音蓋處境使然耳好讀書力不能置則假於人或節衣減食以購之阮囊屢空泊如也人以其持躬謹飭或非笑之愀然曰僕不幸生五歲而孤老母茹藥含辛撫育成立第不善治生飄泊十年迄無成就春暉寸草方抱憾之不遑何敢結客少年場豪放自負重貽老母憂哉嗚呼此殆所謂市隱者也近以夢羅浮仙館詞囑予正譜嘗選刊數首入摘星樓詞選所爲詩亦多佳構有嘯秋閣集哀然

可觀戊申秋予客海上仲瑚寄全藁來屬爲刪訂爰摘佳句序而歸
之自述云結茅賸有三椽屋種秫慙無十畝田枉道豈甘爲妾婦駐
顏何必羨神仙感時事云大夢難醒悲赤子斯人不出痛蒼生題桐
花牋云越客情絲牢縛繭洛妃顏色想驚鴻又云繪出相思憑玉版
傳來密語踐金鈿題箏樓泣別圖集句云相思相見知何日多少春
風怨別情又云青山樓外幾千里不是愁人也斷腸送許伏民入藏
云暫拋生計花三逕難消情絲柳萬條請纓終子思磨盾投筆班生
愧典籤清福本遭天妬忌浮生都是命安排和楊壽丞無題云誰信
黃楊偏厄閨獨拋紅豆又驚秋閒居自遣云得失無關安我素窮通
有命聽諸天咏蚊云一腔熱血原無用儘爾貪饕也未妨雨後云濕
雲爭擁樹涼月忽窺窓又云雨餘蛙鼓亂風定蠟燈明句向靜中得

愁從閒裏生遣興云交多譽我終非益事到求人大是難又云莫怨
西風吹夢醒好扶殘醉過谿橋秋夜云萬里關山歸夢少幾家庭院
得秋多寄懷孫次青張伯英云皖公山色今何似衰艸斜陽各一天
書懷云須謀菽水權爲客得免飢寒便是仙絕望功名閒似鶴怕談
時事噤同蟬又云交從冷淡偏能久詩到清真便是佳卽此二句以
論仲瑚生平及其詩甚愜當也

會稽章蔚生封翁炳慶以古學鳴時於時哲嗣夢香司馬文孫德俊
鏐尹均擅詞章得家學之力居多惜全稿散佚今夢香於行篋中檢
得封翁雜詩數首只此已見一斑亟爲備錄七律六首秋色云萬象
鮮妍與日謀杖藜流覽此勾留楓林葉老霞成綺蘆渚人歸雪滿舟
千萬螢燈穿古徑兩三螢火臥中流菊花天氣寒添重猶有霜枝不

改秋秋聲云萬籟蕭然與耳謀詩情無限寫綢繆芭蕉疏雨懷人館
蘆荻西風捕蟹舟江上琵琶千古恨霜中碁杵萬家愁歐陽讀罷涼
如水四壁蟲吟爲報秋紅蓼云携筇前過荻蘆洲多少胭脂逐浪浮
猩血染成波亦艷鷗羣驚起火初流斷霞影入江天遠落日光蒸水
國秋最是漁舟人罷釣酡顏相映曲灘頭白蘋云楓葉凝丹菊染黃
瓊英低亞鏡湖旁半池風約花隨浪萬點星沈水滿塘斷岸未冬先
降雪前汀當晝亦飛霜蘆邊夜靜潮初起錯認衝波鷺一行咏雲錦
云天孫妙手獨空空織出秋雲與錦同縠色遠連新霧碧綃痕低襯
斷霞紅綺羅萬象中天瑞日月雙梭大化工嶺上忽披晴絮帽繽紛
宛在畫圖中露珠云天街夜色近三更露脚斜飛萬點盈紅綴江楓
涼有色綠穿池柳濕無聲拋來玉女盤中密擎到仙人掌上明月印

圓波心一顆何如潤物徧晶瑩又七絕八首葛漫云奇巖峭立莫登
臨安息飛來直到今壇上仙翁何處去尙留丹井照人心蕙江云淺
水廻環十里隄姚江西復舜江西秋來只有菱和芡風送餘香入剡
溪粟里云百官東去幾徘徊倉廩供儲共阜財何必鉅橋誇厚澤薰
風此地尙南來荀莊云滕薛爭先古舍邊村夫默咒一心虔青雲有
路何須上卜得幽棲不亞仙蘭渚云崇山峻嶺茂林旁禊事脩餘逸
興狂溪水一灣猶是曲春風何處送杯香柯亭云中郎當日此停驄
椽竹裁成一笛工千古奇材逢賞識莫從爨下惜焦桐戴山云越王
探載記當時攬勝還來謁古祠不比首陽高隱士一生甘苦有誰知
梅市云柯橋東畔路縱橫非市緣何以市名爲有乘鸞仙尉到滿城
催遍賣花聲又會稽道墟村景十八詠齋臺云禪林松竹深臺上人

何處曾記嘗膽時名山乞呵護第一泉云玉液勝金波靈泉出太阿
無雙詩入譜想見飲茶多柴塢云千丁入深山採樵人不見談棋局
未終世界滄桑變浴鸛泉云浴罷鶴飛去空餘浴鶴泉卅溪明月夜
舞態尙蹁躚南洋坂云苜黍已芄芄南洋舊臥龍草廬何處問一片
白雲封麻園云花木今森森桑麻舊密密夜來絡緯聲猶帶鐘聲出
東市云非市名爲市前人舊詠題賣餚簫一曲聲渡小橋西鑑云村
前別有村抱水人家住日暮荷鋤歸柳陰低鎖處籟適樓云誰伴幽
人獨樓頭吟趣足商音兩耳騰何必黃岡竹裡江云一曲漾晴波沿
塘種芰荷折來與郎嗅香比外湖多果園云纍纍橘與棗經霜熟偏
早夜來風雨驚落紅紛不掃江山環秀樓云樓高獨吟眺秀色供三
千菱月落杯底松風臥榻前黃草漈云舊聞今廢頽衰草斷猶續何

如野燒空能向東風綠兩山洞天云青山與丹山兩山合一巘何處
問桃源石門留一綫海崖云片石兀玲瓏潮生北海風題詩人不見
虞水尙朝東杜浦云地傍僊山麓村鄰有道墟洲前蘆荻老舊是少
陵居嶼云入山山欲迷奇哉獅顧狀一聲何處鐘四面皆屏障宜嘉
尖云排闥兩山青一峯高且大昂頭天外觀江海環如帶

夢香近在蘇州府慕彼此知名已近十載惜未一面戊申七月予赴
吳門訪之不值晤哲嗣德俊五年重面相見歡然索夢香詩承德俊
錄寄數首因并及之魁文農方伯惠贈菊花數種口占四絕云數種
秋葩帶露寒膽瓶拳石共盤桓黃花大有橫行勢笑指東籬作籛看
(黃蟹爪)白描一幅寫空空郭索無聲繪未工玉蕊經霜秋有力一
枝搖曳攬西風(玉蟹爪)負嶠嶰嶰有風神不道黃花亦與均若使

淵明腰再折頓教馮婦笑詩人（虎鬚）老圃秋容瘦不支嫣然含笑
舞新姿自經霜後顏逾赤彷彿華清賜浴時（醉楊妃）又畫梅譜言
梅有四字嘗分咏之疊花如品字云滿幅吳牋亂掃烟紛披霜萼比
珠聯寫來紙上都成格圈到枝頭不待圓半掩殘雲餘口角低俚頑
石壓暑邊分明一管生花筆畫法原從字裏詮又交枝如爻字云盡
道梅花幾世修枝成連理向巖搜詩緣加點應义手人爲逃名肯出
頭五夜冰霜拳縞鶴一天風雪架銀虬旁柯礙道何妨刈瘦幹雙撐
亘古秋又交木如亞字云得玲瓏處便玲瓏繪理原通造化功十字
偏留空隙白已文巧闕曲闌紅烟雲洗盡盡頭瘴冰雪妝成玉樣工
鷗背半翻斜照影天然都在畫圖中又結梢如爻字云疏疏密密寫
柔梢筆化爲煙著紙拋殘雪壓枝低作友凍雲蓋頂便成交半空樹

杪寒陰互數點天心易象包誰向夢中吞不止孤山有鶴正眠巢夢
香名紹齡德俊字稽山一鶴獨善偶句近時文社好以兩不黏合之
題分咏二句謂之詩鐘每揭曉稽山一鶴輒居第一是亦獨擅專長
者其偶句佳者甚夥不及備錄暇當選備一斑

沈太侔錄示合肥江潛之雲龍五古一章題云內子以東坡生日生

余以東坡死日生戲贈內子云生死一東坡形影我與爾不信脩髯
人化爲娟娟子問之戒和尚理必衷一是是男還是女是生還是死
世有學道人請下一轉語造句結想可謂玄妙之至又聯軍陷都城
黃光祿昌璘聞變赴都於市上得皇六子畫冊寄我海陵云兩聖蒼
皇西去日一官被跣北來時殘山賸水依然在斷墨零縑知付誰可
是王孫餘寶玦劇憐怨女泣冰絲此身拚向江河老臣本金門舊畫

第十 第十九期
師飛勁渾成辭尙體要潛之集中七律當以此爲壓卷

曩歲都中設陶情詩社有賞菊廻文詩如王又陶云年年對酒菊花黃
客舍秋風秋夜長天有別情離恨苦烟雲過眼滿林霜蜀遯云隣
結秋花菊有因燕來重問幾時春新秋又醉花前酒人笑花閑花笑
人皆廻環可誦尙不生澀

著潛吟社以采蓮曲命題應課者都作七絕太侔以爲誤予謂小詞
有採蓮子卽七言絕句萬紅友註竹枝詞云竹枝女兒乃歌時羣相
隨和之聲猶採蓮曲之有舉棹年少等字則采蓮子亦可名采蓮曲
也惟南中黃少白瑞蓮作七古云大姑十五顏色嬌小姑十三妖且
嬌短髮齊額眉不描藕合衫子錦纏腰生小江干慣弄潮結伴同登
採蓮船青蒿畫槳雙蘭橈蓮葉綠衣花紅綃手擎涼露珍珠跳芙蕖

出水輕風搖隱約人面胭脂調誰家兒郎驄馬驕停鞭注目垂楊橋
花魂人意兩欲銷阿姊藕絲雪條條妹剝蓮子見心笛蓮心味苦儂
心慘絲牽儂恨長不消幸有莫愁湖未遙莫愁莫愁濁酒澆

長吉體詩學者多矣得其神似者二十年來僅見媚香女士一人而
已予曩著栩園詩話曾摘刊其警句因限於篇幅未嘗全錄今見少
白詩亦學長吉爰觸舊感錄二首以見媚香之才固不可及也月宮
曲云鴛幃夜冷璇宮霜三十六天丹桂香金蟾抱魄泣秋影素娥倚
樹看吳剛白雲羅羅走如馬一桁簾波隔烟瀉冰輪碾盡碧空塵珮
玉丁當自天下瓊樓到處霓裳舞頭白仙髯守寒杵星光盞綠如淚
珠亂灑人間作秋雨長吉鬼才此則鬼仙矣又懊儂曲一首尤佳其
濃艷處直與品花寶鑑所載田春帆簾鈎曳玉聲玲瓏詩如出一手

其辭云茜窓環玉敲東丁碧城晝掩桃花扇春魂如烟隔花語芙蓉
鏡裏搖空青螺山寸碧春愁重悄倚花冠身不動絳雪分飛鏡角鸞
綠雲壓折釵頭鳳瘦盡垂楊一捻腰紅閨酒醒麝香銷珍珠寮中壓
金線年年錦字迴文挑儂采蓮花比人面蓮花易見人難見淚滴紅
珠濕翠衣愁吟白苧題紈扇雲房寂寞延孤嘖蛟絲小罩凝脂塵凍
壁霜華隱濃黛金魚瑣斷璇閨春香肌冷襯琤琤珮罡風吹墮青鸞
背漫訝蓬山隔萬重屏山尙在蓬山外雲翹側輶銀螭蟠淒馨繡被
啼痕乾簾波無聲剪秋綠櫻桃一樹紅闌干銷魂陌上青絲騎金屋
無人碧天醉鈿盒空勞郎定情燭花似替儂垂淚箏堂夜靜燈影涼
銀蟾暗逗眉尖黃錦羽文鱗斷消息玉簫咽恨雲天長閒情不斷如
春水目送飛花三萬里一寸春心久化烟無端又逐東風起驚才絕

艷曾不多覩每讀一過覺其好處實有不可以言語形容者

某公子才華絕世舉世間事物無不知不能者生平好客尤仗義疏財交游中有負之者輒以人箝負我我不負人自解而卒爲人所弄傾其資產不足償臺猶百級也潦倒中所爲詩尤沈痛懇摯讀之足爲改容其書懷五首云不辰如我奈天何歷盡艱難與坎坷生不能堪此潦倒死將何以對妻孥與人結納知恩少被鬼揶揄受累多自恨聰明無用處偏生難得是糊塗誤我生平一字情剖開肝膽看分明友朋交際恩逾重兒女歡場債已輕塞口聲名三不就通身手段百無成財才自古相迴避通煞英雄馬長卿兄喪母葬兩年中死不能僵百足蟲孤注肯拚真性命家翁難做假痴聾身無我主蟻旋磨命與時乖螭守宮畢竟顛連何日了問天其奈亦瞢瞢只該阮眼向

人青那得人爲我解鈴已悟死生皆有命不圖宗祖竟無靈灰心直覺身願贅嘗膽空悲血尙腥可與人言無一二只應覬與鬼神聽萬手辛苦一年年勉強爲人最可憐骨肉已經能割捨親朋豈必肯周旋愁中歲月無寒暑客裏人情有變遷一事思量聊自慰死能不負受恩錢未幾索逋者日急公子遂赴河死其家蓋已赤貧如洗所僅存者惟室中陳設品然變之亦不足以償百之一債主絕望庸詎知公子在日業於年前保有命險至是其夫人乃出保單收銀以抵其債也有餘猶衆皆感嘆其書懷詩結句云云蓋已成竹在胸者久矣噫嘻仗義如此古今來甯有二人哉惜未詳其姓氏否則乞大吏爲之旌義亦足以模楷世人也